

Iwarakha yo upachera i Napeturo Malhove o uholhelha

Iwarakha yo upachera i Napeturo yaalhepiye ni akarumiya Napeturo. Napeturo anochokholha ulhepa iwarakha aya wo wiihimicha yaari apani ni wa apani unrweeha aya iwarakha iyo. Anolhepa iwarakha aya wiira irwee wa attu anrumelhenhe Kuristo amwarelhe mwiilhaponi mu, ehanne aya “alheto o velhaponi va”. Nhina iwarakha ilha ahohokolhelha venchi uhimiacha nenko nlhove nno wa oshoma aya (nlhako wo 1:1, 17 ni 2:11). Ukhahawaya ilha iwarakha ilha iholhikaana ni iwarakha i Napaolo wa attu o Uefeso vakittu vakittu, attu enchi etu anoona wiira iwarakha yo upachera i Napeturo yaalhepiye baada yo iwarakha i Napaolo wa attu o Uefeso, iyaakha yo 65 baada yo uyaria wa Kuristo. Napeturo yaalhempe iwarakha ilha anari iwani yo Urumi uneehana aya, Ubabeli (nlhako wo 5:13).

Napeturo ahohimia wiira alhempe ilha iwarakha ilha wo nlhatu wo “uhelhani nrima ni uhiimiechesherani wiira ulha phi nnema wo ikekheni wa Nlhuku” (nlhako wo 5:12). Tho, chihaawo chittu chinolhikaana mu iwarakha yo upachera i Napeturo (2:11-3:7) ni iwarakha i Napaolo wa attu o Uefeso (5:18-6:9) ni iwarakha i Napaolo wa attu o Ukolosai (3:18-4:6). Nhina chechiyo milhako miraru chiyo, aholhehera mwaha unaacha wiiwanana

mmilhokoni ni uvarechesha malhehero a attu o ikuru yo utawara. Thothoni tho, anowaahelha mirima attu anrumelhenlhe Kuristo uvilhelha vanohuva aya ukhalhaway a umalhelha wo chittu uhaatameria (nlhako wo 4:1).

Chiri nhina

Napeturo anowiihimiacha anene ni waashikuria oshoma aya (nlhako wo 1:1-2).

Anonshukuru Nlhuku wo mwaha wo noopo nokawaniya, ni maana aya nhina ukumi aya (nlhako wo 1:3-2:10).

Tho anowaalhaka attu anrumelhenlhe Kuristo iphiro yo ukhalha rata velhaponi ni waahimeria mwaha wo ukhalhiya makhalhelho anolhoka, wa ntu ni ahanu awe, ipotta ni nkunya aya (nlhako wo 2:11-4:11).

Baada yo vavawo, Napeturo anowaahelha attu mirima cho uvilhelha ikatema vanohuva aya (nlhako wo 4:12-5:11).

Anoomalhiha iwarakha aya (nlhako wo 5:12-14).

¹ Mii Peturo, karumiya awe Yesu Kuristo, Kinoowiha iwarakha uwaninyu mwaatti attu nthanhliye ni Nlhuku, mmwareelhe nkhalhaka thoko alheto ilhapo cho Uponto ni Ugalatiya ni Ukapadokiya ni Uasiya ni Ubithiniya. ² Nlhuku Athithi ahoukumihani mwaatti wo uttuna wawe, nkamwaahapihiya wo Iphumu awe, mmwe mwanrumelhelha Yesu Kuristo ni uhapihiya wo iphome awe.

Kinoulhapelhelhani nnema ni mpuha mwinchi.

Nikhulhuvelho no machiri

³ Atotopelhiye Nlhuku, Athumwanaya Athithi Yesu Kuristo! Ukhahawaya wo ikiriri awe yul-hupalhe honiyara wo nayelhi wo unhhimusha Yesu Kuristo nnookhwani. Honivaha nikhulhuvelho no ukumi, ⁴ ninoweherera ihu upatta. Nhakhu uhinonta ama unanara ama uwahlawalha ushungiye wa attu awe. Nnema unishunggenre awe Nlhuku wiirimu. ⁵ Ni inyu mwaatti nnoshungiya wo machiri a Nlhuku wo upisha nrima mpaka vanohalha inyu upatakulhelhiya noopo vanohalha aya umalha mahuku.

⁶ Nteelhiyeke wo yoyo nlhatu uyo, inakhalhaka vano, wo ikatema ikani nnokhalha nchukulhaka ni uttwaruwa wo ulhikachiya wo iphiro chinchi. ⁷ Ulhikachiya winyu uwo uri wo nlhatu wo uhimiechesha ikekhiaye yo nrima inyu, ukhalhawaya ata nlhuku no idhahabu, ninolhiya nrenje, ninolhikachiya vamooroni. Chiicho etu, mirima chinyu chinokhulhuvelhiya upwaha idhahabu, chinolhikachiya wiira chikhomaalhihiye. Umalhelha waya uwe waakhalha uto-topelhiya ni uthimichiya ni uvahiya nthimicho nihuku Yesu Kuristo vanohalha awe upatakulhiya. ⁸ Mwaatti nnonttuna inakhalhaka khannapacha umwoona, munrumelhelhaka inakhalhaka khannomwoona. Paahi nnoteelhiya chinene wo nthimicho mwinchi uhinooria uhimiachiya, ⁹ ukhalhawaya nhopochera nttuvo no upisha nrima winyu, niri phi nlhatu wo woopolhiya winyu.

¹⁰ Wo yoyo noopo uyo etu, anamilhohi ahaavia-avia ni ukohakoha chinene mwaha wo yoyo

nnema wo uhiyereriya uwonya waalhohenre aya uyo, unohalha inyu uvahiya mwaatti ni Nlhuku. ¹¹ Nkayaalhikacha ukohherera ikatema yaani ni iphiro chinohalha aya uwa. Yaani ikatema yaahimiye ni Iphumu ya Kuristo irii nhina mwaya vaahimmie aya ntwarusho unohalha awe upatta ni nthimicho unowa awe upatta. ¹² Nlhuku ahaapatakulhelha anamil-hohi wiira mitheko chaya khachari wo nlhatu wayaru, nansho wo nlhatu ninyu mwaatti thoko chihimiye ni Malhove Orera wo machiri o Iphumu ya Nlhuku ukhuma wiirimu. Ittu inothanana aya ata minepa o wiirimu wiiwa yoyo mwaha uyo.

Wihaniya ukhalha Makhalhelho Matakatifu

¹³ Paahi etu, irusho chinyu chikhalheke tayari, nhiittialhe, nshiheke. Nkhulhuvel-heke nnema uriyoothe nnohalha inyu uvahiya ikatema Yesu Kuristo vanohalha awe uwa tho. ¹⁴ Nkhalheke o wiiwelhelha thoko ashaana a Nlhuku, nhittwarettware tho nikakata no uhilhoka mwaarina inyu ikatema vaari inyu nhichuwel-haka ikekhenye ya Nlhuku. ¹⁵ Nansho meetelho inyu akhalheke matakatifu thoko Nlhuku owihanneni chiri awe. ¹⁶ Ukhalhawaya Malhove Matakatifu aholhepiya wiira, “Nnokhalha atakatifu ukhalhawaya ni Mii ki ntakatifu.”

¹⁷ Mwaatti vanonlhapelha inyu Nlhuku, nnomwiihana Thithi. Paahi etu nchuwelheke wiira yoyo phi nonhukumulha kila ntu wo uhimmweha wiitho wo mitheko chipannge awe. Paahi etu, nkhalheke rata mwiiilhaponi mmwoovaka Nlhuku. ¹⁸ Ni inyu mwaatti

nchuwelheke wiira khamwoopolhiye ukhuma mu uwonyani wo chittu chinotanganya, wo nchurukhu mena idhahabu, wiira mwoorie ukhuma uri meetelho inyu uhinlhoka mpochenre inyu wa manyaapwiiya inyu.

¹⁹ Nansho mwoopolhiye wo iphome itakatifu ya Yesu Kuristo, Mwaana o Khondoro o uhiremara mena nrottelha. ²⁰ Yoyo phi athanlhiye ni Nlhuku ilhapo ihanaya wuupiya, nkaapatakulhiya mahuku ammalhelha alha wo nlhatu winyu mwaatti. ²¹ Wo iphiro awe, nnonrumelhelha Nlhuku anhishimunshe ni ummaha nthimicho, Paahi etu nrima ni ukhulhuvelha winyu ukhalheke wa Nlhuku.

²² Ukhalhawaya vano nheehapiha nhokhalha atakatifu wo urumelhelha winyu ikekhenne, paahi etu kila mmoka anttuneke nlhoko awe wo nrima woombone wo uhikhalha unafiki ni uttunana mwaashineneru. ²³ Ukhalhawaya wo iphiro yo nlhove nikumi na Nlhuku no mahuku o uhimalha, mwaatti nhoyaria tho, nhikhalkaka thoko nnyepu wo imbeyu inokhwa, nansho imbeyu yo ukumi. ²⁴ Thoko Malhove Matakatifu chinohimia aya wiira,

“Kila ntu ri thoko nthaakhuru,
Nthimicho wawe wonkhaye uri thoko ituva.
Ukhawalhaya mathaakhuru anoonyalha ni ituva
chinoomora.

²⁵ Nansho Nlhove na Athithi ninlhokelha mahuku o uhimalha.”
Ni nenso nlhove nno phi Malhove Orera ahimeriye inyu.

2*Yesu Kuristo phi nlhuku nikumi*

¹ Paahi etu nhiyeke uwonya uriwoothe ni woothacha ni unafiki ni ihache ni nulhumo no uruwana. ² Nkhalheke thoko ashaana ashikaani ayarelhe naanano, chinophavelha aya mapelhe, ni inyu chiicho mphavelheke mapelhe o uhithakanihiya o Iphumu ya Nlhuku, ikhalhe wiira mwawuriaka yayo munnuwe ni woopolhiya. ³ Thoko Malhove Matakatifu chinohimia aya, “Nhochuwelha vano wiira, Athithi phi orera.”

⁴ Mmweeke wa Athithi, nlhuku nikumi naakhotiye na attu nansho Nlhuku nkaathanlha nenno wiira phi nlhuku no ukhulhuvelhiya.

⁵ Ni inyu mmweeke thoko malhuku makumi athanlhiye utheka inupa yo Iphumu ya Nlhuku, nkhalhaka opochera ishaani atakatifu anokumiha isadaka cho munnepani chonteehlaha Nlhuku wo iphiro ya Yesu Kuristo. ⁶ Ukhalhawaya Malhove Matakatifu aholhepiya wiira,

“Mwooneke! Kinoweemesha nlhuku no ukhulhuvelhiya Usayuni,
Nlhuku no nsingi no vakhoonani nithanlhiye,
Ni kila ntu nonrumelhelha yoyo khanoolhiya muru.”

⁷ Paahi etu uwaninyu mwaatti nnorumelhelhava, nna nlhuku nna phi no ukhulhuvelhiya thoko Malhove Matakatifu chinohimia aya. Nansho wa attu ahinrumelhelha

“Nlhuku nikhotilhe aya atheki wiira khaninlhoka

Nihothathuwa vano ukhalha phi nlhuku no ukhulhuvelhiya no nsingi no ukhulhuvelhiya.”

⁸ Tho vakittu vakina Malhove Matakatifu aneera, “Nna phi nlhuku ninokwakwathuwa aya attu, Mwalha unaawulhusha attu.”

Attu anokwakwathuwa ukhalhawaya khano-rumelhelha nttenga, phi chiichammo cheesh-eriye aya toka khalhayi.

⁹ Nansho mwaatti phi iyari ithanlhiye, o poc Hera ishaani e imwene, nikosho nitakatifu nithanlhiye uvara mitheko cha Nlhuku, wiira nhimiache mitheko chawe owiihanneni nkhum e mwiipiphini nkookelhihani munthukoni mwawe mwo ushangiha. ¹⁰ Khalhayi mwaatti khamwaari attu a Nlhuku nansho vano phi attu awe. Yeyo ikatema iyo Nlhuku khowonenlheni ikiriri nansho vano howoonelhani ikiriri.

Anamitheko a Nlhuku

¹¹ Ashilhoko aka, kinoulhelhani thoko alheto ama attu o uvira velhaponi va! Nshem-beke nikakata no mwiiruttuni nihinaathana ni minepa chinyu. ¹² Mwaakkhalhaneke rata attu ahinchuwenlhe Nlhuku, ikhalhe wiira ata yowootheriakani wiira nhowonya, awe anthimicha Nlhuku nihuku no uwa Athithi nno, vanohalha aya woona mitheko chinyu choombone.

¹³ Mwiiwelhelheke kila ittu inolheheriya ni attu, wo nlhatu na Athithi. Mweewelhelheke amwene arii ni ikuru yuulhupalhe, ¹⁴ ama attu anotawara athanlhiye ni Nlhuku wiira aatwarushe attu anopanga cho uhilhoka ni waatotopelha attu anopanga moombone.

¹⁵ Ukhahawaya Nlhuku nothanana wiira mwaamaalhihe attu ahichuwenlhe ittu ni akumbafu vanopanga inyu chittu choombone.

¹⁶ Nkhalheke thoko aneethi ni uneethi inyu uyo uhikhalhe phi iphiro yo uvitha uhilhoka winyu. Nansho nkhalheke thoko anamitheko a Nlhuku. ¹⁷ Mwaathimicheke attu onkhaye. Mwaattuneke ashilhoko inyu. Munthimicheke Nlhuku. Mwaathimicheke amwene.

Malhikaaniho o uttwaruwa wa Kuristo

¹⁸ Ni inyu ipotta va, mwaarumelhelheke rata manyaapwiya inyu anourumani mitheko chaya. Nheewelhelhe attu o nrima woombone ama o maalha vekha ayaru nansho mweewelhelheke ni attu o mahuchuru ayo. ¹⁹ Ukhahawaya wowo phi urera nrima, ntu avilhelhaka ntwarusho ni-hinophwanelhiya awe, wo uchuwelha wiira Nlhuku nowa ammaha ibarakha. ²⁰ Ukhahawaya nnohalha uttuviyani mwavilhelhaka ntwarusho no uwonya winyu? Nansho mwavilhelhaka vanotwarushiya inyu wo nlhatu wo upanga morera, Nlhuku nowa ovahani ibarakha wo nlhatu thoko yoyo.

²¹ Yayo phi ayo ehaneliye inyu ukhalhawayaya Kuristo ni uyo ahotwarushiya wo nlhatu winyu, nkoohiyerani nlhikaaniho, paahi etu muntwariheke. ²² Yoyo khaapannge ittu yo uwonya mena khoothanche vamalhakuni vawe. ²³ Vanruwanne aya khaakhunlhe nlhove no uhilhoka. Vaatwarushiya awe khoopopinhe attu nansho ankhulhuvenlhe Nlhuku, nohukumulha chittu we ikekhiaye. ²⁴ Kuristo mwanene ahokusha uwonya wihu mwiiruttuni mwawe

vansalaabani, wiira nikhwe mu uwonyani, niwe naakhalha akumi mu ikekhan. Wo waatiya wawe mwaatti nholhamihiya.

²⁵ Ukhalhawaya mwaatti mwaari ikhondoro chinothwelhelha nansho vano nhonhokolhelha Nshunga ni O weemelhelha ukumi inyu.

3

Manyopani ni manyottato

¹ Ni inyu manyopani mwaathimicheke manyowannyu, yakhalkaka ahaawo manyottato ahinrumelhelha Nlhove na Nlhuku, awe ni ayo aarumelhelha wo meetelho inyu wo uhahimeria nlhove, ² ukhalkawaya anowa yoona meetelho inyu o uhinanara ni o uthimichiya. ³ Wiireeriha winyu uhikhalhe wo wiipamba irutturu, wo utiva ikharari ni uwarelha chittu cho idhababu ni ikuwo cho nhakhu, ⁴ nansho ukhalkheke wo urera wo munrimani, urera uhinolhalha, yaani nrima wo mpuha ni wiitimarikha, unkulhuvelhiya chinene mmiholho wa Nlhuku.

⁵ Chiichammo phi enre aya wo wiireriha manyopani atakatifu o khalihayi vavo. Yaari ankhulhuvelhaka Nlhuku ni o waahelhelha manyowannyaya, ⁶ thoko chenre aya Asara. Wo waathimicha owannyaya Aburahimu, yeehana Pwiya, ni inyu mwaatti phi achishaana aya mwapangaka moombone wo uhoova ittu iriyoothe.

⁷ Ni inyu manyottato chiicho, mwaakhahanek rata manyaahanu inyu, mwaalhoheke, mwoonaka thoko attu ihirina machiri thoko mwaattiva va, ni woona thoko ashikhunaninyu

anothalha inyu waapocherana vamoka nnema wo ukumi ukhuma wa Nlhuku. Mwapangaka chiicho khiiwo ittu inohalha utiyelhelha ul-hapelha winyu.

Uttwaruwa wo upanga moombone

⁸ Wo umalhihera, kineera, mwaatti onkhaye va nkhalheke nlhoko wa attu o nrima mmoka, o woonelhana ikiriri, o uttunana mwaashineneru, o nrima woombone ni o wiitimarikha.
⁹ Nhaahokolhoshere chittu cho uhilhoka attu anoupangelhani chittu cho uhilhoka, ama uruwana thoko chinoruwaniya inyu nansho mwaalhapelheke attu ibarakha, ukhalhawaya yayo phi ehanelhiye inyu ni Nlhuku mmwe mwaapochera ibarakha. ¹⁰ Ukhahawaya Malhove Matakatifu aneera,
 “Ntu nottuna ukumi,
 Ni woona mahuku o mpuha,
 Echinanelheke nlhimi nawe chinene, huulhu-mache malhove o unanara,
 Huulhumache malhove o woothacha.
¹¹ Ahiyekе uwonya, apangeke moombone,
 Aavieke mpuha, aavieke chinene.
¹² Ukhahawaya miitho a Athithi anaaweha attu o nrima worera,
 Anowewelhelha vanolhapelha aya, nansho ikohi ya Athithi inaakhota attu o uwonya.”

¹³ Mpani nohalha uupangelhani ichimwa mwavarecheshaka nrima wo upanga chittu choombone? ¹⁴ Nansho ata mwatwarushiyaka wo nlhatu no upanga chittu chinothanana awe Nlhuku, nhoreeriya. Nhimwoove ntu riyoothe mena nhikelhiye nipampa, ¹⁵ nansho

munthimicheke Kuristo, mmamirimani mwinyu ukhalha phi Athithi mahuku onkhaye. Mwi-icheesheke tayari umwaakhulha kila ntu nohalha uukohani makhulhuvelho arii mmamirimani mwinyu,¹⁶ mwaakhulhaka rata ni wo wiitimarikha. Nkhalheke ni nrima woombone, ikhalhe wiira vanoruwaniya inyu, attu anoupan-gelhani ichimwa wo nlhatu no meetelho inyu oombone nhina Kuristo ayo, awe olhiya muru wo malhove anoolhumacha aya.¹⁷ Ukhahawaya iri nambaya uttwaruwa wo nlhatu no upanga moombone, Nlhuku attunaka, kuliko uttwaruwa wo upanga chittu cho uhilhoka.

¹⁸ Ukhahawaya Kuristo ni uyo ahokhwa nkwhaha mmoka tu wo nlhatu wo uhilhoka wa attu onkhaye. Ntu oombone ahaakhwelha attu o uwonya wiira aarweehe wa Nlhuku. Eeviye iruttu nansho nkaakhalha nkumi wo wooria wo Iphumu ya Nlhuku,¹⁹ ni ahorwaa waahimiachera minepa chaari mu uttukiyani.²⁰ Yayo phi alhe minepa yaakhonte unrumel-helha Nlhuku vaaweherenre awe wo waavil-helha ikatema Anuhu vaakoorosha aya isafina. Nhina yeo ikalhava iyo, attu vakani tu, attu nane phi yookokweelhe maashi.²¹ Yayo maashi ayo yaalhikaaniihiye ni ubatiizo unowoopol-hani mwaatti vano. Kuhii ubatiizo wo urapa ni uchuururia nihiro mwiirut tuni nansho wo malhehano wa Nlhuku anopangiya wo nrima woombone, wo iphiro yo uhiimmwa wa Yesu Kuristo,²² aarweelhe wiirimu, vano akhalhaka wiimonono wa Nlhuku, aatawaraka minepa ni ikuru ni machiri chikhalkaka mmathathani mwawe.

4*Ukhalha wo unkhalhuvelha Nlhuku*

¹ Paahi ukhalhawaya Kuristo aatwaruwilhe mwiiruttuni, paahi ni inyu vano etu mwiilhip-iheke wo nrima thoko yoyo ukhalhawaya ntu twaruwilhe mwiiruttuni hohiya uwonya. ² Toka vano etu, nhikhalhe nnikakatani mwo uhilhoka nansho mu uttunani mwa Nlhuku ikatema yuhalhenheni mwiilhaponi mu. ³ Ukhalhawaya khaliayi mwahopanga chittu chinopangiya ni attu ahinchuwenlhe Nlhuku, vaatwara inyu nikakata no uhilhoka ni ulhavalhava ni uwuria utheka ni uhapalhiya pufia ni umenyekha ni waana indewo ni ulhapelha isinyago. ⁴ Vano attu ahinchuwenlhe Nlhuku ayo anooshanga vanowoonayani mwaatti nhittimakachaka waatwara mommo nnovira aya mucharilhe chittu cho unanara chinene mmo. Phi nouruwanayani.

⁵ Nansho anowa wivaraanga yoyo mwaha uyo wa Nlhuku khanlhe tayari waahukumulha attu akumi ni attu akhwilhe. ⁶ Phi nlhatu etu Malhove Orera ahohimiachiya wa attu akhwilhe ayo wiira awe aahukumulhiya nookhwa wo mitheko chaya cho mwiiruttuni chipangilhe aya thoko chinohukumulhiya awe kila ntu. Nansho wo Iphumu ya Nlhuku awe yaakhalha akumi thoko Nlhuku chiru awe nkumi.

⁷ Umalha wo chittu chonkhaye uhaaya, paahi etu nkhalhaneke irusho, nshelhelhiheke nlhapelhaka. ⁸ Upwaha chittu chonkhaye chiyo, ntutunaneke wo nrima wonkhaye, ukhalhawaya uttunana phi nokhuneelha uwonya winchi. ⁹ Mpocheraneke mwaashineneru umanupani

winyu wo uhitukutuwacha. ¹⁰ Kila mmoka avarelheke mahalha avahiye awe ni Nlhuku thoko karumiya o ipilhi yoombone, o nnema wo waakavihera attu akina a Nlhuku. ¹¹ Ntu olhumachaka Malhove a Nlhuku olhumacheke malhove anokhuma wa Nlhuku mwanene, akavihaka ntheko akaviheke wo machiri avahiye awe ni Nlhuku, ikhalhe iphiro yo uthimichiya Nlhuku wo iphiro yo Yesu Kuristo. Nthimicho ni wooria ukhalhe ni uyo wo mahuku o uhimalha! Aye.

Uttwaruwa wo nlhatu wo unrumelhelha Kuristo

¹² Ashilhoko aka, nhishange mwaha wo ulhikachiya winyu chinene mwoonaka thoko ittu ihinapacha inyu woona. ¹³ Nansho nteelhiyeke ukhalhawaya nnookaviha uttwaruwa wa Kuristo wiira mmwe mwaateelhiya chinene ikatema vanohalha awe uhokolhia wo nthimicho wawe. ¹⁴ Mwaruwaniyaka wo nlhatu wo urumelhelha nchina na Kuristo nhoreeriya, ukhalhawaya Iphumu yo nthimicho iri phi Iphumu ya Nlhuku rii vamoka ni inyu. ¹⁵ Hikalhe ntu riyothe munlhokoni mwinyu notwarushiya wo nlhatu wo ukhalha ntu owiiva ama ntu owiiya ama ntu otteka ama ntu noolhumacha chittu cha attu wiira aanihe. ¹⁶ Nansho mwatwaruwaka wo nlhatu wo unrumelhelha Kuristo, paahi etu nhuulhiye muru nansho nthepiheke unthimicha Nlhuku, ukhalhawaya nneehaniya wo nchina na Kuristo.

¹⁷ Ikatema yo uhukumulhiya ihaatameria, ni uhukumulhiya unochokholha wa nlhoko wa attu a Nlhuku mwanene. Yakhalkaka uhukumulhiya unochokholha uwanihu hii, paahi etu, umalha

waya unohalha ukhalha chani wa attu ahinrumelhelha Malhove Orera a Nlhuku? ¹⁸ Thoko Malhove Matakatifu chinohimia aya,

“Yakhalhaka inoorika wa attu anopanga chittu choombone mmiholho wa Nlhuku woopolhiya,

Inohalha ukhalha chani etu wa attu ahinon-thimicha Nlhuku ni wa attu o uwonya?”

¹⁹ Paahi etu, attu anotwaruwa wo uttuna wa Nlhuku, eesheke ukumi aya mmathathani mwawe Nrata aya o ukhulhuvelhiya ni uthepiha upanga mitheko choombone.

5

Nlhoko wa attu anomwiiwelhelha Nlhuku

¹ Mii owulhuvalha ni nholhelhi o nlhoko wa attu anrumelhenlhe Kuristo nkhunaninyu, ahimiechenshe Kuristo vaatwaruwilhe awe ni ntu kinohalha ukavihana munthimichoni nnohalha upatakulhiya kaanyuma. Kinoulhepelhani chinene mwaatti ashulhupalhe aholhelhi ashikhunanaka wiira, ² nshungeke nlhoko wa attu a Nlhuku avahiye inyu waashunga ni weemelhelha. Mwaashungeke wo uhikhanyererihiya nansho wo uttuna winyu thoko chinottuna awe Nlhuku. Kuhii wo nlhulha wo upatta nchurukhu nansho wo nrima winyu wonkhaye. ³ Nhaaholhelhe wo machiri attu anaashunga inyu nansho nkhalheke malhikaaniho o utwariya ni yoyo nlhoko uyo. ⁴ Ikatema Nshunga Mulhupalhe vanohalha awe uwa vawo, inyu mwaatti nnoowa mwaattukiya mphumburu wo nthimicho uhinothaalha.

⁵ Ni inyu ashimirawo va, mweewelhelheke ashulhupalhe aholhelhi. Eiyo, mwaattiva onkhaye va mwiitimarikheke mwaashineneru ni ukavihana ukhalhaway Malhove Matakatifu aneera,

“Nlhuku nowaavinga attu o wiichoona Nansho nowaavaha nnema attu o wiitimarikha.”
⁶ Paahi etu mwiitimarikheke mmoononi mwa Nlhuku nri mwo machiri, awe otheeshani ikatema aya yaayaka. ⁷ Munhiyereke nipampa ninyu nonkhaye ukhalhaway yoyo phi noushungani.

⁸ Nhiittalhe, nshelhelhiheke! Ukhahaway mmalhaponi inyu, Nakare noorukureriacha thoko kharamu noturuma alhupattaka ampatte ntu ankhuure nfiaa. ⁹ Ni inyu mwaatti nlhipeke nrima, munvingeke, nchuwelhaka wiira uttwaruwa thoko wowo phi naapatta ashilhoko inyu arii velhaponi va. ¹⁰ Nansho mwaatti nnotwaruwa vakani va, Nlhuku ri machokholhelho o nnema wonkhaye owiihanneni mwaatti mu nthimichoni mwawe mahuku o uhimalha nhina Kuristo Yesu, nowa olhiphani kabisaa ni uvahani ikuru ni machiri ni ukhalha nsingi wo ukhomaalha. ¹¹ Machiri akhalhe uwannyawe mahuku o uhimalha! Aye.

Isalamu cho umalhihera

¹² Wo moono wa Nasuluwano, kinomwaalhakelha aka ukhalha munnaka o ukhulhuvelhiya kiholhepa iwarakha yo malhove vakani ilha wiira kuuhelheni nrima wo uhimiechesha wiira ulha phi nnema we ikekhenne wa Nlhuku. Mweemelhelheke rata yoyo nrima uyo.

¹³ Nkutiro wa attu anonrumelhelha Kuristo naninyu o va vaneehana aka Babeli va, athanlhiye vamoka ni inyu mwaatti anouvahani isalamu. Anaaka Namako chiicho anouvahani isalamu. ¹⁴ Nshikurianeke kila mmoka wo nrima wo uttunana.

Mpuha ukhalhe ni inyu mwaatti onkhaye nri awawe Kuristo va. Aye.

**Makua New Testament 2015
Makhuwa-Meetto: Makua New Testament 2015 New
Testament**

copyright © 2016 The Word for the World International

Language: Makhuwa-Meetto

Contributor: The Word For The World

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

 You include the above copyright and source information.

 You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-11-11

PDF generated using Haiola and XeLaTeX on 11 Nov 2022 from source files dated 29 Jan 2022

87ae4d2f-90f6-5bdd-b41e-00464a1ad514